

SOZIETÀ E ECONOMIA

## Endesfides e strategies per l turism

*A Moena l'è stat la radunanza de l'Apt dant da la sajón da d'invern, con bilanz, nomines, valutazions e la costion de la reforma de la lege sul turism portèda dant da l'assessor provinzièl Roberto Failoni*

En jebia ai 12 de dezember se à dejout la radunanza de l'Apt de Fascia, te sala Simonin Maza de la scoles de Moena a la prejenza de 150 sozi. I ponts al orden del di i revardèa la prezentazion, discusion e aproazion del bilanz preventif, del pian operatif per l'an 2020 e del pian strategich plurienal; l'integrazion del Consei de Aministrazion; altra costions eventueles a carater no deliberatif.

**Flavio Volcan: mobilità e rodes**

L prum a tor la parola su envit del president Fausto Lorenz l'è stat Flavio Volcan, assessor al turism de Moena, che l'ha portà l salut de l'amministrazione de comun: «L'an

passà aon abù de burc fac leé al clima-l'ha dit-ma se aon uzà de nef. Cognon rengraziar la Provincia per l didament, ma voi ricordar che amò l'è n muion da far, soraldut per meter en segurezza l teritorie». Volcan l'ha amò uzà fora doi argomenc de gran emportanza, chel del massa trafich che no ge dèsc ai ghesc la giusta parbuda de la val e chel del turism leà a la rodes, con l percors dedicà che con pech sforz podessa esser fenì.

**Fausto Lorenz: n bilanz fort e segur**

Dapodò à tout la parola l president de l'Apt Fausto Lorenz, che dò aer rengrazià l comun de Moena per ge aer dat alberch e i assessores prejenç,

l'ha analisà l bilanz de previjion per l'an 2020: «L bilanz de previjion tol ite vigni an n smaoramenc ti numeres, l'è n bilanz fort e segur che l ne dasc l met de investir ressorses sul teritorie, mioran la perferida turistica che l'è la maor rejon de vadagn te val».

L bilanz de previjion per l'an 2020 l conta cosc e vadagnes per n total de 5.870.000 euro. Valguna de la novitèdes che è states prejentèdes les sarà te la mobilità, con na neva linea de skibus, la linea 7, che corirà la strèda da Poza al jouf de Ciareja. Semper en cont de mobilità, ai 26 de dezember e ai 2 e 6 de jené sarà la corses spezièles del servije de coleament anter val e aeorporc Fly Skishuttle.

Amò, sarà l'introduzion de neva ressorsers umane, più avisa chela de n project manager tel ciamp de la ativitèdes outdoor; tel ciamp di evenc, apede ai Suoni delle Dolomiti, Piste Azzurre, EWS e ritiro de la Fiorentina, sarà de neves evenc de musega te la sajón da d'invern 2020-2021.

**N focus su la sajón da d'istà**

L'istà passà l'è stat positif per chel che vèrda i dac, cresciui tant te la prejenzes (+44.540), che tel numer de ghesc rué te val (+12.259). Chisc smaoramenc vèl tant per Fascia che per nesc competitors, n segn che la vacanze sa mont les é scialdi più conscidredes da la jent. Sodesfazion ence per coche la é jita ti meisce de jugn e setember, n temp che da vèlch an vegn valorisà da l'Apt con projec e servijes dedichè: +55%. L marcià maor per l'istà resta chel talian, l'88% di ghesc, con la Lombardia region più raprejentèda.

**Marco Barbacetto tel consei de aministrazion**

Al secondo pont l'era l'integrazion del consei de aministrazion. Anter i 27 conseieres defati no se troa più l'inom de Davide Moser che se à demetù. «Cogne dir che me n despiasc - à dit l president Lorenz - canche zachei ne lascia e con dut l lurier fat: Davide se à tout sù gran responsabilità, en pruma linea te l'endrez di Mondial Junior stac te Fascia, l'è stat ence mie vize. Ge die n gran develpai de cher per chel che l'ha fat per l'Apt e per Fascia». A sie post te la categoria aziendes alberghieres l'è ruà la soula candidatura de Marco Barbacetto de Sèn Jan, votà positivamente da duta la radunanza, con sia soula astenjon.

**Paolo Grigolli: i ghesc chier esperienzes e emozions**

Serà sù l secondo pont, ge é stat dat lèrga a doi prejentazions, chela de Paolo Grigolli de Trentino School of Management e chela su la neva reforma del turism de l'assessor Roberto Failoni.

Grigolli à metù dant na reflexion strategica a cura de SMTC sul davegnir de l'Apt de Fascia. Anter l'auter, l'è stat prejentà l nef ghest, l nef viajador che l'è na persona a la enrescida de esperienzes: cultura del post, prodoc enogastromomics, recorrc da se portèr dò. L turist de anchecondi l vel proèr emozions che ge resta tel temp. Per chest ge vel pontèr su la creazion de servijes e prodoc che dae l met de viver chesta esperienzes. Ge vel lascèr de se concentrèr demò su la ativitèdes classiches strentes te n temp curt de sajón, model del turism de massa, e ge vel enveze ge dèr più emportanza al turism alernatif, ge vel ge resservèr più spazie a marcé spezifics adaté soraldut per l turist internazionèl.

Amò l'è stat metù dant l besegn de aer ence n cambiament de cultura, n cambiament ti valores che se proferesc. I valores pel esser duré desche strument de marketing e creazion de turism, i pel esser a vèlch vida venui. L'ejempie l'è chel de Pejo, che à fat nascer n prum portoi talian plastic-free: n picol sforz per n mudament di valores, n picol investment che se tramuda aboncont te vèlch da poder vener.

**Roberto Failoni: la costion de la seconda cèses**

L'assessor al turism de la Provincia Autonoma de Trent l'è entervegnù metan dant ence te Fascia la neva reforma de la lege sul turism, na lege oramai veia, datèda 4 de aost 1986. La reforma vèrda più che auter a 3 ciampes: la struttura de la governance turistica; la tassa de sojornanza tel Trentin; la Guest Card. De dut chest ve daron cont più inant su La Usc di Ladins, ajache Failoni à jà anunzià che sarà amò de altra scontrèdes sul tem via per de jené. L'assessor à ence dit che la Provincia la é dò che la laora per ferèr l sistem ilegal de la seconda cèses dates a fit, e a sie dir te Fascia n'è n muion, che vegn apontin fitèdes senza l paament de la giusta tassess, touta ite chela de sojornanza.

Daniele Verra



La radunanza de l'Apt de Fascia te sala Simonin Maza de la scoles de Moena.